

1 TESALONAIKA

Pepa Paulo ingere munğa panzi kalo-tawana tamâta simo Tesalonaika lawea

Tesalonaika nde lawea ñalae tonje ikeno Masedonia tâno. Paulo munğa imo ñinde itula pâri ara panzi, kala tamâta pinde kalonzi tawana Yesu. Andeta kinzi Juda tamâta sikai kazâña pa Paulo, kala ipilenzi ilâ (Pâri Tamâta 17:1-10). Ilâ ipânga Korin lawea lâ, aku muli nga Timoti imâ itapâri papa ñana Tesalonaika ngu nenzi kalo-tawana, kala Paulo ingere ngua ñine ilâ panzi. Paulo ilo ndo keno panzi, aku lâ pepa ñine tini itu ipu tini kaika pa ilonzi kalonzi. Itula vetâña arara pinde ñana ma sipaveta kuku, ñinenğa itula ngua panzi ñana nenda mandîña lâ mateña nianzi wa Yesu ne zo ñana itaulo imâ kilo (4:13-18).

¹ Maka ñato, Sailas nga Timoti nga naña Paulo warakângu, maka kamo taitu, kala naña angere ngua ñine imâ pa miki kalo-tawana tamâta kamo Tesalonaika lawea, miki ñinde uru kalomi tawana Tamânda Maro Kindeni nga Maro Yesu Kirişi. Maro Kindeni ne wisi-wisi wa wisi-pisi wa imâ pami.

*Paulo ilo ara ñana Tesalonaika tamâta nenzi
kalo-tawana*

² Ikura zo rârâni maka uru kaloma ngere ñanami, aku maka kaporo ndanđe ilâ pa Maro Kindeni. Maka uru kano pa i ñana miki kê ikura lâ nema

noŋa rârâni. ³ Maka kawama ndaŋge pa Tamânda Maro Kindeni, ŋana tu nemi kalo-tawana uru ipaŋo ilomi kalomi ŋana kaveta vetâŋa ara kâ. Aku miki tinimi mwasa panzi tinimi pinde, kala uru kaveta wurâta ara nâ. Aku miki kao tinimi ŋana Maro Yesu Kirisi kâ, kala uru kamandi kaika ku kamo nâ.

⁴ Nima-nambwe wukale, maka kasama tu Maro Kindeni ilo ndo keno pami, aku ipateami tu ma kapâŋga i ne ŋgu sondo. ⁵ Maka kasama ŋine ŋana tu muŋga, lâ zo ŋinde maka kakai pâri ara kamâ pami, ande pâri ara ŋinde ŋandai ipâŋga pami itogo tapâriŋa kaa nâ ŋga. Ŋinde ipâŋga tava Koroani Sapâŋa ne walo wa ne mâsi kaika wa, aku miki kamora nema kalo-tawana kaika ŋinde pwataki lâ. Miki warakami nde kasama ŋana maka nema pavilâŋa lâ zo ŋinde maka kamo ŋginimi. ⁶ Miki kalonjo Maro Kindeni ne ŋgua lâ, kala miki kapaveta kuku maka nema vetâŋa tava Maro Ŋalae ne vetâŋa. Ŋinenŋa malia ŋalae tina ipâŋga pami lâ, andeta Koroani Sapâŋa iveta ilomi ara kala miki kandeka ku kamo kapaipa kuku pâri ara ŋinde. ⁷ Aku nemi vetâŋa ŋinde itula nzâla ara ndo panzi kalo-tawana tamâta rârâni simo Masedonia tâno wa Akaia tâno wa. ⁸ Miki katula mâsi ara ŋana koka Maro Ŋalae ne ŋgua muli, aku ŋinde ilâ itogo wâŋgu ne nduŋeŋa mwasina. Andeta nduŋeŋa ŋinde ilâ ipâŋga lâ Masedonia tâno wa Akaia tâno simbonzi nâ, ande tia. Ikura lawea rârâni, ande tamâta silonjo parinami tu miki kalomi tawana Maro Kindeni. Mine kala maka nema wurâta ŋana katula parinami panzi kâ keno, nde tia. ⁹ Aku kinzi warakanzi kala uru situla ŋgua ŋana vetâŋa

arara n̄inde miki muᅅga kaveta, lâ zo n̄inde maka kamo kumi. Kinzi situ parinami tu miki kapu mulimi panzi maro laᅅeᅅa lâ, aku kapalele ilomi kalomi ilâ pa Maro Kindeni Via Tamwata, ina Maro Mao Kanaᅅo, aku kaponu muli pa i simbo nâ. ¹⁰ Aku situ parinami tu miki uru kao tinimi ᅅana zo n̄inde Maro Kindeni Natu ma ipile samba lawea ku itaulo imâ kilo. Inani kala Yesu, muᅅga imâte lâ, andeta Maro Kindeni ipaᅅo i imo via kilo. Aku i ma ikea ᅅana kinda kâ, kala ma tamo ara lâ zo muli n̄inde Maro Kindeni ne wisi-nâna ᅅana tamâta nenzi kiesaka kâ ma ipâᅅga nia yo.

2

Paulo itula ᅅgua pwataki ᅅana wurâta muᅅga iveta lâ Tesalonaika

¹ Nima-nambwe wukale, miki warakami kasama tu maka muᅅga kaveta wurâta kaa nâ lâ zo n̄inde kamo kumi, ande tia. ² Miki kasama tu maka muᅅga kamo Pilipai lawea, aku lâ lawea n̄inde maka kakai nâna ᅅalae. Kinzi siyaula karaema wa siporo ᅅgua pavaligiᅅa pama wa. Andeta lâ zo ᅅana maka kamâ pami, nenda Maro ᅅalae Kindeni ipu tini kaika pa iloma kaloma, kala maka kamege ᅅana kazâᅅa n̄inde kâ, ande tia ndo. Maka kakisi kaika nâ, aku katula Maro Kindeni ne pâri ara pami. ³ Aku lâ zo ᅅana maka kanomi tu kapalele ilomi kalomi ilâ pa Yesu, ande maka kaporo ᅅgua soki ku kaveta vetâᅅa potomule wa laᅅeᅅa wa, ande tia. ⁴ Maro Kindeni isama maka kilalama lâ, aku i tamwata ipatea wurâta pama tu ma katula i ne pâri ara. Mine kala maka ᅅandai iloma tu tamâta ma sisuka maka ᅅama kâki ᅅga. Maro

Kindeni simbo nâ imora iloma kaloma pwataki lâ, aku maka iloma tu i nâ ma ilo ara pama njana nema wurâta kâ. ⁵ Miki kasama lâ, aku Maro Kindeni kala isama mine nâ tu maka munja kaporo njua mâru-mâru pami, ande tia ndo. Aku maka njandai iloma yosi njana nemi kelekele kala kaporo njua ara pami. ⁶ Lâ zo njinde, maka njandai iloma tu miki ma kandekanama nga. Aku mine nâ, maka njandai iloma tu tamâta pinde ma sindekanama nga.

⁷ Mao nâ, maka kamo Yesu Kirisi ne pâri-tamâta. Mine kala kalonjo nga; ambo maka iloma tu miki ma kasukama njana kelekele pinde kâ, ande maka kakura njana kaporo kaika pami tu kaveta mine. Andeta zo njinde maka kamo kumi, ande maka kamo mwasa nâ, itogo taine uru imagegea natu puro-puro mine. ⁸ Maka iloma ndo keno pami; mine kala maka kandeka nâ njana kaporo katula Maro Kindeni ne pâri ara pami. Aku maka kala kapaveta sondo njana kapayaula nema via njana kavila miki kâ, njana tu maka iloma ndo ikeno pami. ⁹ Nima-nambwe wukale, miki kasama lâ njana wurâta njalae maka munja kaveta, lâ zo njinde kamo kumi. Maka kamâ njana katula Maro Kindeni ne pâri ara pami, aku maka tinima pwâka tu miki ma kaveta wurâta njalae njana kakatona maka njana kânjana-nunja kâ. Mine kala maka kaveta wurâta kaika lâ kari wa mbo wa, njana kakai mbumbu tu kapako kapwama.

¹⁰ Miki kasama lâ, aku Maro Kindeni kala isama mine nâ njana vetâja rârâni maka kaveta lâ miki kalo-tawana tamâta njinimi. Maka nema vetâja njinde nde ara ndo lâ Maro Kindeni nao; maka kaveta vetâja soki tonje tia. ¹¹ Miki kasama tu

maka muṅga kaveta kema ara nâ pa miki taitu-taitu, itogo tamâta uru iveta kie ara panzi natu mine. ¹² Mao nâ, maka kaporo ṅgua ṅana igagati ilomi kalomi ku ipu tini kaika pami. Aku maka kanomi tu ma kamo sondo, ikura Maro Kindeni tamwata ipatea pami mine. Maro Kindeni ina isarawami tu ma kasama i ne walo ṅalae, aku isarawami tu ma kamo kunzi ṅgu ṅine i uru ikai maro panzi.

Kinzi kalo-tawana tamâta lâ Tesalonaika lawea simandi kaika ṅana sikale malia kâ

¹³ Lâ zo ṅana miki kalonjo Maro Kindeni kawa ṅgua maka katula pami ṅinde, ande miki kakai ṅgua ṅinde itogo tamâta nâ nenzi ṅgua, ande tia. Miki kalonjo ku kakai ṅgua ṅinde itogo Maro Kindeni kawa ṅgua mao. Aku mao nâ, ṅgua maka katula pami ṅinde nde Maro Kindeni kawa ṅgua. Aku i tamwata uru ikai wurâta kaika lâ miki kalotawana tamâta ilomi kalomi. Ikura zo zo maka kawama ndanḡe ilâ pa Maro Kindeni ṅana ṅine kâ. ¹⁴ Nima-nambwe wukale, miki kapâṅga katongonzi Maro Kindeni ne kalo-tawana tamâta simo Judia tâno, kinzi ṅinde sipaipa kuku Yesu Kiriſi lâ. Miki kakai malia lâ warakami nemi ṅgu mbaunzi, itogo kalo-tawana tamâta simo Judia tâno muṅga sikai malia lâ Juda ṅgu mbaunzi mine. ¹⁵ Muṅga kinzi Juda ṅgu sipu Maro Yesu tavanzi kinzi ṅgua-tulâṅa tamâta pâta simâte, aku siṅara maka tona. Kinzi taṅanzi kaika ku sikai kazâṅa pa vetâṅa ara rârâni Maro Kindeni ilo papa ṅinde. Aku kinzi simo sitogo tamâta rârâni nenzi nânâo mwasina. ¹⁶ Kinzi sitogo tu sipono nzalama, ṅana maka ma kakura tu katula pâri ara panzi tamâta lâ tinikoa

ngũ tia. Kinzi tininzi pwâka tu Maro Kindeni ma ivilanzi ngũ ñinde tu simo vianzi ku simo nâ. Mine kala ikura zo zo kinzi siveta kiesaka, kala kiesaka ñinde ipânga ñalae tina. Aku ñana ñine kâ Maro Kindeni ne wisi-nâna nde imâ panzi lâ.

Paulo ilo ndo tu imoranzi kalo-tawana tamâta lâ Tesalonaika lawea kilo

¹⁷ Nima-nambwe wukale, kinzi Juda tamâta siñara maka lâ, kala kapilemi ikura zo pinde. Maka kamora naomi tia, andeta iloma nde keno pami yo. Maka iloma ñalae tina tu kamorami kilo. Mine kala maka kaveta wurâta kaika karoto nzâla ñana kataulo kamâ pami. ¹⁸ Maka iloma tu kamâ pami, aku naña Paulo warakângu apatogo tu ataulo amo kumi mbwaningũ pinde. Andeta Sadana isae nzâla ñanama. ¹⁹ Maka iloma tu kamo kumi, ñana tu lâ zo ñana nenda Maro Yesu ma itaulo imâ kilo, ande kelekele ndia ma isuka maka tu kamandi kaika ku kandeka lâ i nao, a? Anja kelekele ndia ma itula pwataki tu maka kaveta nema wurâta ara lâ, a? Maka ma kandeka ñana miki ni. Tamâta tonje ipole miki ñana iveta ndekâña ipipi lâ iloma kaloma, ande tia. ²⁰ Mao nâ, maka ma kandeka ñana miki kâ, aku miki warakami ma kaveta iloma kaloma ikeno ara ndo.

3

Paulo isupwa Timoti ilâ pa Tesalonaika lawea ñana isukanzi kalo-tawana tamâta

¹ Maka kamo tava iloma malia mine lee, ñineŋga iloma pateo tu zo nga ipânga lâ. Mine kala maka kapa ngua tu maka rua ma kamo Atens lawea,

² anɔa Timoti nde ma kao imâ pami. Ninda-nambwe Timoti nde Maro Kindeni ne kuleŋa tamâta ŋana itula pâri ara ŋana Yesu Kirisi kâ. Maka rua kao i imâ ŋana isukami ku ivilami, ŋana nemi kalo-tawana ma ikeno kaika nâ. ³ Ambo Timoti ma imâ pami tia, ande nâna wa malia nemi ŋgu siveta pami ŋinde ma iveta miki pinde ilomi kalomi rârâ. Miki warakami nde kasama tu Maro Kindeni muŋgani ipatea kindu tu ma takale malia mine nâ ŋana nenda kalo-tawana kâ. ⁴ Muŋga maka kamo kumi, aku lâ zo ŋinde maka kapaimi tu malia kie-kie ma ipâŋga pa kindu. Aku miki kasama tu zo sakamao mine nde imâ ipâŋga lâ. ⁵ Mine kala naŋa amo nâ, ande tia. Naŋa atu asama ŋana miki nemi kalo-tawana tu ikeno mana, ande kala ao Timoti imâ pami lâ. Naŋa kalonɔu loko tu koroani saka nenzi koipu ŋalae nde iveta samâŋa pami tâ ku isowe ilomi kalomi, kala maka nema wurâta ilâ kaa nâ. Andeta tia.

Paulo indeka nâ, ŋana tu Timoti ikai ŋgua ara itaulo imâ

⁶ Ayo, Timoti imâ imo kumi lee, ŋinenɔa ipilemi ku ilâ. Kala muŋga nâ imâ ipâŋga pa maka lâ, aku itapâri ŋgua ara ndo pama. Itula ŋgua tu miki nemi kalo-tawana ikeno kaika ndo, aku miki uru tinimi mwasa nâ panzi tinimi pinde. Aku itapâri tu ikura zo rârâni miki kalomi ŋgere ŋana maka kâ, aku wisimi ara pama tona. Aku miki kala ilomi ŋalae tu kamâ kamora maka, itogo maka iloma ŋalae tu kamâ kamora miki mine nâ. ⁷ Nima-nambwe wukale, maka kalonɔu parinami tu nemi kalo-tawana ikeno kaika ndo, aku ŋinde ipu tini kaika pama lâ zo ŋinde malia wa nâna rârâni ipâŋga

pama lâ. ⁸ Maka kasama tu miki kapaipa ndo kuku Maro Njalae, kala ñine maka iloma ara ku wisima puu ndue lâ. ⁹ Maka kaloma ñgere ñanami ku kandeka pâta lâ nenda Maro Kindeni nao. Maka kawama ndaŋge ilâ ñalae pa Maro Kindeni, andeta nema ndekâña nde ñalae ndo, ipole nema ñgua ñinde. ¹⁰ Maka uru kano kaika pa Maro Kindeni ikura kari wa mbo wa. Maka kano tu i ma iveta nzâla pama ñana kamâ kamorami kilo. Ñineŋga maka ma kakura tu kasukami, aku nemi kalo-tawana ma ipâŋga ñalae.

Paulo ino pa Maro Kindeni tu ma io i ilâ panzi

¹¹ Maka iloma tu Tamânda Maro Kindeni tamwata kuku nenda Maro Njalae Yesu rua ma sikai nzâla piti, ñana maka ma kamo kumi. ¹² Aku maka iloma tu Maro Njalae ma isuka miki, ñana nemi tini-mwasa panzi kalo-tawana tamâta sitavanzi tamâta rârâni ma ipâŋga ñalae, itogo maka nema tini-mwasa ikeno pa miki mine nâ. ¹³ Maka iloma tu Maro Kindeni ma isuka nemi kalo-tawana. Mine kala lâ zo ñana nenda Maro Njalae Yesu tavanzi ne tamâta rârâni ma sitaulo simâ kilo, ande Tamânda Maro Kindeni ma imora miki tu kamo mbâra-mbâra ndo, nemi kiesaka toŋge tia.

4

Kinda ma taveta vetâña potomule ndimo

¹ Nima-nambwe wukale, maka muŋga kapananami ñana vetâña arara ñana miki ma kapaveta kuku. Ambo miki ma kapaveta kuku vetâña arara ñine, ande Maro Kindeni ma ilo ara. Aku maka kasama tu nemi vetâña ikeno mine nâ.

Kala ñine maka kakai Maro Ñalae Yesu ndamwa ku kaporo kapu tini kaika pami tu miki ma kaveta vetâña arara mine ipânga ñalae. ² Maka muñga kakai Maro Ñalae Yesu ndamwa ku katula ñgua tukuña rârâni yâti, aku miki kalonjo lâ.

³ Maro Kindeni ilo tu miki ma kamo ilomi mbâra-mbâra, aku i ilo tu miki ma kanjenje ñana vetâña sakamao ñana kapalulua tinimi potomule kâ. ⁴ I ilo tu miki ma kapakatona sondo ñana vetâña sakamao tava ilo-kalo sakamao uru ipânga nâ lâ ilomi. I ilo tu miki ma kamo sondo, aku ma kapaveta kuku vetâña ara rârâni i tamwata ipatea pami ñinde. ⁵ Tia ma miki kambe ñana ilo-kalo wa vetâña sakamao ñinde, aku miki warakami ma kaveta vetâña sakamao ñana kapalulua tinimi potomule kâ, itogo kinzi tinikoa uru siveta mine. Kinzi ñinde sizizâla ñana Maro Kindeni ne pateña, kala siveta mine. ⁶ Miki ma kaveta soki tonje mine panzi kalo-tawana tamâta ndimo. Maka muñga katula ñgua pwataki pami tu muli ñga Maro Ñalae ma ipare nia panzi tamâta ea siveta vetâña sakamao kie mine rârâni. ⁷ Maro Kindeni ipatea kindi ñana tapaveta kuku vetâña potomule mine, ande tia ndo. Ipatea kindi ñana tamo sondo lâ i nao. ⁸ Mine kala tamâta ea ipu muli pa ñgua tukuña ñine, ande i ipu muli panzi tamâta tia; ipu muli pa Maro Kindeni, ina kala uru io ne Koroani Sapâña imâ pami.

Kindi ma tapakatona sondo ñana nenda vetâña kâ

⁹ Muñga Maro Kindeni ipanana miki warakami ñana vetâña ñana tinimi mwasa panzi kalo-tawana

tamâta kâ. Mine kala naŋa ma aŋgere ŋgua pinde imâ pami ŋana vetâŋa ŋinde kâ, ande tia. ¹⁰ Aku mao nâ, miki uru tinimi mwasa nâ panzi kalotawana tamâta simo lawea ndoni lâ Masedonia tâno. Ambo taitu nima-nambwe wukale, maka iloma tu kapu tini kaika pami ŋana miki ma kaveta vetâŋa ara mine ipâŋga ŋalae ndo.

¹¹ Miki ma kapakatona sondo ŋana kamo mwasa nâ, aku kaveta warakami nâ nemi kelekele. Kapakatona warakami, aku kaveta wurâta tava warakami nâ mbaumi, ikura maka muŋga kapananami mine. ¹² Ambo miki ma kaveta mine, ande wurâta ma ikeno panzi tinimi pinde ŋana sisukami ŋana kelekele kâ, ande tia. Aku tamâta simo niaka ŋana pâri ara kâ ŋinde ma sindeka nâ ŋana nemi vetâŋa kâ.

Maro Ŋalae ma itaulo imâ kilo ŋana igona kindakâ

¹³ Nima-nambwe wukale, maka iloma tu miki ma kasama ŋgua mao ŋana vetâŋa ndia ma ipâŋga panzi matenja tamâta. Tia ma kalo-sukâŋa ŋalae ipâŋga pami, itogo uru ipâŋga panzi tamâta ŋinde kalonzi tawana Maro Kindeni tia. Kinzi ŋinde uru sio tininzi ŋana nenzi mandija lâ kuru nia, ande tia. ¹⁴ Aŋga kinda nde kalonda tawana tu Yesu imâte lâ, ŋineŋga imandi imo via kilo. Mine kala kinda tasama tu Maro Kindeni ma ipaŋonzi kalotawana tamâta ŋinde muŋga simâte, aku ma ionzi simo kuku Yesu. ¹⁵ Maka katula Maro Ŋalae kawa ŋgua pwataki pami mine; lâ zo ŋana Maro Ŋalae ma itaulo imâ kilo kâ, ande kinda tamâta kala tamo viânda lâ tâno kulu ŋine ma tamuŋga panzi tamâta ŋinde muŋga simâte, ande ma tia. ¹⁶ Ŋana tu Maro

Kindeni ma isunja kawa, aku aŋelo nenzi koipu ŋalae ma isarâwa, aku Maro Kindeni ne tando ma ita. Aku Maro Ŋalae tamwata ma ipile samba ku indue imâ. Aku tamâta ŋinde muŋga simâte tava nenzi kalo-tawana, kinzi ŋinde ma simandi muŋga, aku ma simo vianzi kilo. ¹⁷ Ŋinde ma ilâ lâ, ŋineŋga Maro Kindeni ma igona kindi tamâta kala tamo viânda lâ tâno kulu ŋine, aku ma takâki talâ kunzi pa nia maa ŋinde ikeno âta. Aku kindi rârâni ma tamo taitu kuku Maro Ŋalae, ma tamo mine ku tamo nâ. ¹⁸ Mine nde ara ŋana miki kalo-tawana tamâta rârâni ma katula ŋgua ŋine pwataki, aku kapaturu warakami ilomi kalomi tu ma ipu tini kaika pami wa iveta wisimi puu ndue wa.

5

Kindi tamo tao tininda nâ ŋana Maro Ŋalae ne zo ŋana ma itaulo imâ kilo

¹ Nima-nambwe wukale, maka nema wurâta ikeno ŋana kaŋgere ŋgua ŋana zo ndia wa kari tai ŋapia vetâŋa rârâni ŋinde ma ipâŋga kê, ande tia. ² Miki warakami kasama tu Maro Ŋalae ne zo ŋana itaulo imâ kilo kê nde ma ipâŋga nâ, itogo panawe tamwata imâ ŋana ne panawenja lâ mbo ŋgini-ŋgini, aku kindi tazizâla ŋana. ³ Kinzi tamâta ma siporo mine, “Zo ŋine nde ara pâta, kala tamo ara nâ”. Andeta lâ zoni ndaina, ande vetâŋa ŋana izavarunzi kê ma nao panzi imâ walele nâ, itogo nâna uru ikainzi taine sipaguguanzi natunzi mine. Aku kinzi tamâta ma sikura tu siŋgeŋge ŋana nâna ŋinde kê, ande tia.

⁴ Anḡa nima-nambwe wukale, miki ḡandai kamo kondoma ilo ḡa. Mine kala lâ zo ḡana miki kamora mâsi ḡinde imâ ipâḡga, ande miki ma wisimi motu itogo tamâta wisi motu ḡana panawe tamwata imâ ḡana ipanâwe kâ, mine ndimo. ⁵ Miki kalo-tawana tamâta rârâni nde ḡana kamo kari wa sinâla nâ ilo. Kinda ḡandai tamo mbo tava kondoma nenzi tamâta ḡga. ⁶ Kinzi tamâta simo niaka ḡana pâri ara kâ ḡinde uru sikeno nâ, andeta kinda ma taveta mine ndimo. Ara ḡana kinda ma tao tininda nâ, aku tapakatona ilonda kalonda sondo ndo. ⁷ Kinda tasama tu tamâta uru sikeno lâ mbo nâ, aku uru sinu lââ kaika ku sidauda lâ mbo nâ. ⁸ Anḡa kinda nde tamâta ḡana tamo sinâla nâ ilo. Mine kala ara ḡana kinda ma kalonda ḡgere sondo. Vetâḡa ḡana kalonda tawana Maro Kindeni kâ, anḡa vetâḡa ḡana tininda mwasa panzi tininda pinde, vetâḡa rua ḡinde nde itogo nenda pasawaḡa ḡana tiḡgi-tiḡgi kâ. Aku vetâḡa ḡana tao tininda pa Maro Kindeni tu ma via mao ilua kinda lâ samba lawea, ande vetâḡa ḡinde itogo nenda siḡgâra kaika ḡana tasawa lâ kulunda mine. Aku kinda tamandi kaika lâ ḡinde tini. ⁹ Maro Kindeni ḡandai ipatea tu i ma nâna ilua kinda ḡana nenda kiesaka kâ. Ipatea tu nenda Maro ḡalae Yesu Kirisi ma ikai kinda piti lâ kondoma ilo ku via mao ilua kinda. ¹⁰ Yesu imâte ḡana ikai nzâla piti pa kinda tu ma tamo ara kuku i, aku lâ zo ḡana i ma itaulo imâ kilo, ambo kinda tamo viânda tâku tamâte tâku, ande ma tamo viânda kuku i. ¹¹ Mine kala ara ḡana miki taitu-taitu ma kapu tini kaika panzi kalotawana tamâta, aku kavilanzi ḡana simandi kaika tona, itogo miki uru kaveta mine.

*Maro Kindeni uru ivilanzi kalo-tawana tamâta
 nana nenzi vetâna ara kâ*

¹² Nima-nambwe wukale, Maro Nalae ipateanzi tamâta pinde tu siveta wurâta nalae lâ miki nginimi. Ipateanzi nana sikai poe pami ku siveta nemi ilokalo sonde. Maka kanomi tu miki ma kamege njananzi tamâta ninde. ¹³ Miki ma kamege ndo njananzi ku kao ilomi ndo ilâ panzi, nana tu nenzi wurâta ninde nde ara ndo. Aku miki rârâni ma kamo ilomi kalomi taitu nâ. ¹⁴ Nima-nambwe wukale, maka kanomi tu miki ma kaporo ngua kaika panzi kalo-tawana tamâta ninde simo itogo wulitia tamwatanzi, nana kapaŋo ilonzi kâ; aku kapu tini kaika panzi tamâta ninde uru simo kalonzi loko nâ; aku kavilanzi tamâta ninde nenzi walo kenô tia. Aku miki rârâni ma kamo mwasa nâ kunzi tamâta rârâni. ¹⁵ Ambo tamâta tonje iveta kie sakamao pami, ande miki ma kakatu mbuku kilo papa i ndimo. Ikura zo rârâni, ara nana miki ma kamandi kaika nana kaveta vetâna ara nâ panzi kalo-tawana tamâta sitavanzi tamâta rârâni.

¹⁶ Ikura zo rârâni, ande ara nana miki ma kandeke ku kamo nâ. ¹⁷ Aku ara nana miki ma kakai noŋa pa Maro Kindeni ikura zo zo. ¹⁸ Ambo vetâna tonje ma ipâŋga pami ku iveta ilomi malia, ande ara nana miki ma kawami ndanġe pa Maro Kindeni. I ilo tu miki tamâta kala kapaipa kuku Yesu Kirisi ninde ma kaveta mine.

¹⁹ Lâ zo nana Koroani Sapâna itu iveta wurâta tonje lâ miki ilomi, ande miki ma kapono nzâla nana wurâta ninde kâ ndimo. ²⁰ Ambo tamâta pinde ma situla Maro Kindeni kawa ngua pwataki pami, ande miki ma tinimi pwâka nana ngua ninde

ndimo. ²¹ Miki ma ilomi patea sondo ŋana ŋua rârâni wa vetâŋa rârâni wa. Ara ŋana miki ma kasaŋa ŋua ara tava vetâŋa ara kaika ndindi nâ, ²² aku kaŋgeŋge ŋana vetâŋa potomule rârâni kâ.

²³ Maka kano pa Maro Kindeni, ina wisi-pisi warika, tu ma ilele miki ilomi kalomi ndo, ŋana miki ma kaveta vetâŋa ara nâ, ikura i ilo papa mine. Aku maka kano papa i tu ma ikatona karaemi wa koranami wa, ŋana miki ma kamo mbâra-mbâra nâ, nemi soki tonje tia, lâ zo ŋalae ŋinde Yesu Kirisi ma itaulo imâ kilo. ²⁴ Maro Kindeni isarawami muŋgani lâ, aku i ma iveta vetâŋa ŋinde ipâŋga pami, ŋana tu i uru iveta ikura ne ŋua pâŋa rârâni.

²⁵ Nima-nambwe wukale, ara ŋana miki ma kalomi ŋgere ŋanama, aku kano pa Maro Kindeni tu ma isukama. ²⁶ Aku ara ŋana miki taitu-taitu ma kapatâŋo mbaumi, ikura kinda kalo-tawana tamâta nenda mâsi mine. ²⁷ Naŋa akai Maro Ŋalae ndamwa ku aporo ŋua mine pami: miki ma kaponu ŋua rârâni ikeno pepa ŋine tini pwataki panzi kalo-tawana tamâta rârâni siloŋo.

²⁸ Nenda Maro Ŋalae Yesu Kirisi ne wisi-wisi imâ pami.

MARO KINDENI KAWA NGUA
The New Testament and Psalms in the Sio Language of
Papua New Guinea
Nupela Testamen long tokples Sio long Niugini

copyright © 1995 Wycliffe Bible Translators, Inc.

Language: Sio

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-02-08

PDF generated using Haiola and XeLaTeX on 11 Nov 2022 from source files dated 9 Oct 2020

21a9f7d3-4b3e-512c-ab21-eb25ed7aef4f